



Que y a ?... Lou câ que trepe e la gate que miaule.
Cauqu'arré de nabèt que-s passe, de segu !...
Ah ! bah ! Qu'at sèy adare ! Aciu, pou miey-escu,
— Que bey u hum leuyè puy de sus la taule,
E la flayre qui-m bié nou-m saberé troumpa
Qu'an pourtat la garbure aqui entau soupa ;
Permou d'aco, Farou que trepe e Min que miaule.

Bam ! cousinère, bam ! Que hiquès de tan bou
Laguéns aquet toupi pansut e qui badalhe
Au cournè tout badoc ?

— D'abor, la sarrabalhe

Qui cau enta balha la gautyouse sabou
Qui humes d'aci 'nla : très pèrnes d'alh ; yambou ;
U bèt hachis de lard dou bielh ; mounyete nabe
— Si n'y a ; — puch, coum se deu enta toute catabe,
Pébe e sau; dus clabéts. Dechèm bouri de pla
Ue ore...

— E que mey, hòu ! Ayde-m, bam, cousinère !
Qu'ey ço qui cau hourni ?

— Que ba calé pela

E héne en quoâte tros cauque poume de terre ;
Lous caulets berds e blancs, en pialots atucats,
Que seran, ets tabé, finemén talhucats,
Apuch, que cau ana béde u drin la toupie,
Pourta-le au ras dou hoec — lou grèch que s'estrembie
Mey à l'ayse à tout tour dou fier talhuc d'aucat
Qui-s quilhe, aqui au miey, coum u nas aricat.
Aném, tout que ba pla ; lou boullhou que s'escape,
Hiquém tout en u cop, la carn e lous caulets
E, 'ntertan que deguén lou toupi qui garlape
Tout aquero ba da quoâte ou cinq biroulets,
Que talharam la soupe ; u drinot de mesture
Qu'ey hort sàbre, mesclade au pâ dous tegnoulets.
Trempe e tourrine !

Aqui, gouyat, qu'as là garbure !